

敕修陝西通志

第十
卷

陝西通志第九十三卷

藝文九

序

傳

書啟

華嶽銘序

晉

傅元

易稱法象莫大乎天地天以高明崇顯而嶽配焉地以廣厚爲基而嶽體焉若夫太華之爲鎮也五嶽列位而存其首三條分方而處其中故能參兩儀以比德協和氣之絪縕故雲行與雨施興雷風以動物是以古先歷代聖帝明王莫不燔柴加牲尊而祀焉於虞則西巡狩至于西嶽而親祭焉於禮則大司掌其分域而大宗典其祀禮也

暮春大師左右丞相諸公于常公逍遙谷讌集序

唐

宋之問

山有姑射人蓋方外海有蓬瀛地非宇下逍遙谷天都近者王官有之不廢大倫存乎小隱跡崆峒而身拖朱紱朝承明而暮宿青霄故可尚也先天之君俾人在宥懽心格於上帝喜氣降爲陽春時則有

若太子太師徐國公左丞相始興公少師宜陽公少保崔公特進鄧公吏部尚書武都公禮部尚書杜公賓客王公黼衣方領垂璫珥筆詔有不名命無下拜熙天工者坐而論道掌邦典者官司其方相與察天地之和人神之泰聽於朝則雅頌矣問於野則賡歌矣乃曰猗哉至理之代也吾徒可以酒合燕樂考擊鐘鼓退於彤庭揆辰擇地右班劍驂六駟畫輪載轂羽幢先路以詣夫逍遙谷焉神臯藉其綠艸驪山啟於朱戶渭之美竹魯之嘉樹雲出於棟水環其室灞陵下連乎菜地新豐半入於家林館層巔檻側逕師古節儉惟新丹堊巖谷先曙羲和不能信其時芳卉後春勾芒不能一其令桃逕窈窕蘅臯超忽驂御延佇於叢薄珮玉升降於蒼翠於是外僕告次獸人獻鮮罇以大罍烹用五鼎木器擁腫即天姿以爲飾沼毛蘋繫在山羞而可薦伶人在位曼姬始縠齊瑟慷慨於座右趙舞徘徊於白雲袞

旒松風珠翠烟露日在蒙汜羣山夕嵐猶且濯纓清歌據梧高詠與
松喬爲伍是羲皇上人且三代之後而其君帝舜九服之內而其俗
華胥上客則冠冕巢由主人則兄弟元凱合是四美同乎一時廢而
不書罪在司禮竊思楚傅常詣茅堂之居仰謝右軍忽序蘭亭之事
蓋不獲命豈曰能賢

上已泛舟昆明池宴宗主簿席序

前人

僕不遊於茲十有五載矣心由物感遐矣不忘跡爲事牽近而難挹
南陽宗邕文通學古器重名高令君有奉倩象賢丞相生元成邁德
春修以文之會上已邀祓禊之遊乃結縉紳撰清辰殷殷麟麟啟霧
驚塵望於昆明之濱觀其大浸川陸博資畿甸鳬鷺發海來往浮沉
日月麗天東西出入千年珍館無復豫章四面金堤仍同樹杞是日
也摩肩錯轂備朝野之歡娛祛服靚粧匝都城之里開翠幕星布錦

帆霞屬餘漚下醉於綃人新聲遠聒於川后縱目遐覽識皇代之承
平得意同歸有吾儕之行樂高朋一座桂樹藂生君子肆筵玉山交
映求哲以言談得俊張華以史漢先鳴登旨酒而無荒絃清琴而自
逸於是涉蓮榻命孤舟桃水漲而浦紅蘋風搖而浪白逼匡阜兮遵
彭蠡邈矣載浮指衡岳而超洞庭眇焉疑到曲島之光靈乍合神魂
密遊中流之萍藻忽開龜魚潛動睎鏤鯨而鼓棹共看燒劫之灰歷
牽牛而問津欲取支機之石晴光劃野有象而必形夕陽照山無竒
而不見思溢今古心搖艸木漢家城闕遺之以雜霸之風秦塞膏腴
潤之以太平之色景窮勝踐歸限嚴闔思染翰於上林願揮戈於濛
汜主稱未醉唯見馬駐浮雲賓共少留自有魚銜明月宮商待叩羣
公之獲助也多序引先題下走之求蒙不逮請授素幅以頌佳遊使
一時之興詠遙存千古之姓名常在

春遊宴兵部常員外常曲莊序

前人

長安城南有常曲莊京郊之形勝也却倚城闕朱雀起而爲門斜枕岡巒黑龍卧而周宅賢臣作相舊號儒宗聖后配元今爲戚里韋文雙珠絕價百金懿名文華得俊於陸氏兄弟掩譽於荀家先人結廬常大厦之地衆賓連袂乘暮春之月觀其奧區一曲甲第千甍冠蓋列東西之居公侯開南北之巷羸女樓下吹鳳降於神仙漢妃館前游龍走其車馬地靈磊落而間出天爵蟬聯而相繼拜郎起草襲雁而傳羔補袞司槐送伯而迎季爾乃闢虛幌敞華筵閨門之秀士咸集京邑之清流畢萃萬株果樹色雜雲霞千畝竹林氣含烟霧激樊川而縈碧瀨浸以成陂望太乙而隣少微森然逼坐尚書未至曳履驚隣宮尹逋來鳴騶動壑登玉俎醉金觴地高而珍物維豐理洞而清徽不雜以醉觀德因談獲情外戚遨遊自攜歌吹主人賞會但有

琴詩於是下高臺陟曲沼鋪落花以爲席結垂楊而代幄霽景含日
晚霞五彩而丹青韶望卷雲春臯一色而凝黛景闌興逸氣清心遠
仰大儒之肆其德可師入處士之廬斯人若在諷誦於逸彭之藻沐
浴於扶陽之墟向來挹清議擅風流即事奇偉佳辰行樂安可無述
文在茲乎鄴國善誘詞宗見收士末內史禊亭之集竊倚琳琅衛尉
別業之遊濫先題目歸軒莫駐麗城將掩拙而不速恨無倚馬之才
婉而且微請談雕龍之什公命賦水字盍成四韻云爾

季春下旬詔宴薛王山池序

張說

有生之微萬殊無方之感一節陽和而動植暢春滿而臯壤悅后皇
所以發時令布新慶二南邁周召之風百辟形金石之詠者也碧流
日暖南山雪殘首獻之浹辰暮春之提日帝京形勝借上林而入遊
咸里池臺就修竹而開宴泉調御府味給天厨仙倡侑樂中貴督酒

太平嘉事前史未書大矣哉一德日新九功惟叙運璿樞而均四氣
握金鏡而靜萬方堯舜湯文不違顏於咫尺夔龍伊呂共接武於朝
廷不可見而見焉不可聞而聞焉豈深思勝殘去殺累百年之至仁
推曆按圖啟千齡之昌運河清難得人代幾何擊壤之歡良有以也
地即青門上路朱邸平臺城烟屢起而汨山野風時來而過水春將
悵別愛落花之灑途夏如欣會玩峰雲之映沼爾其列筵授几分曹
設幕艇送江鳧船迎海鶴魚龍九劔蔓延揮霍鸞鳳鳴簫鼓作申錫
逾於百甕慈惠出於三爵炮炙熏林塘醪醴厭邱壑拊急管於無筭
醉湛恩以取樂羣公賦詩俾僕題序長卿消渴覺含毫之轉遲子雲
壯夫見雕蟲之都廢敢憚鄙詞之訥澁恐貽盛集之蕪穢云爾

韋司馬別業集序

張九齡

杜城南曲斯近郊之美者也背原面川前峙太乙清渠修竹左並宜

春山靄下連俗氛中絕此皆鄭公之有也余固已聞之開元歲夏四月猥忝散職居多放情跂彼一行無忘於夙尚時因七召果獲於前期廼與起居舍人蔡公萬年主簿韓公惠而得朋欣然命駕韋公方拭席見待羞以藥物之滋倚琴相歡雜以嘯歌之韻清言移景閑步周林翻飛目情俯仰爲得斯亦吾儕之樂事幸可而同也扶陽餘慶礪溪古跡樹留梓漆器用天成庭漸芝蘭馨香世襲斯乃韋氏之懿業是所謂異焉而韋公尚其同之樂忘其身之貴均林棲於服冕齊鼎食於焚枯彼未可量吾見其大跡繼前軌將爲龍以爲光道包遠圖豈一邱而一壑二三君子相與志之云

讌韋司戶南亭序

王維

惟帝克辟惟股肱克左右庶績允釐有司多暇舉無違德孰獻其可雖列侍丹陛而罕伏青蒲攄懷致館灞陵南望曲江左轉登一級而

鄠杜如近盡三休而天地始大凝氣向晦蒼蒼寒木式與汝歌多酌
我酒墨客既序親當獸炭膳夫交馳屢奉鮮食夫含德之厚與時偕
化拂衣而放則野人於小隱之中束帶而朝則君子於大夫之後何
軌轍一境是非外物哉且騎有羈勒徒有次舍可以永日可以繼夜
客非詩人之徒歟奚其默矣

鄭縣劉少府兄宅月夜登臺宴集序

李白

夏六月小暑至矣吾兄方幕夜天掃月榭有酒如乳醕我乎城南城
臨近高山俯瞰平隰秦郊漢院相錯如繡且有顥氣足以娛人故數
君子稱觴焉其誰同之有若功曹隴西李華參軍滎陽鄭洵卿琅琊
王休河東裴貺鄭尉京兆韋造皆卿材也聲同而形體相忘道契而
機事不入是以有高會遠望危言浩歌或心愜清機寓興於物或語
及陳迹盱衡而笑於是初筵而惠好修中飲而意氣接既醉而是非

遣夫彭澤採菊隱侯臨風謂之盛矣况高城古臺深夜朗月芳樽良友佳境勝事今夕何夕八者俱並盍亦偕賦於此乎觀二三子之志

華山黃神谷讌臨汝裴毗陵十四明府序

前人

黃廬子滅景上漢千歲矣留碧峰白雲以貽後世故清機勝事未始有極余使於華之明年道侶裴冀亦再命爲臨汝今夏六月假道敝邑稅鞅此地思欲追高步詣真境于是相與携手及二三友生童子將命者六七十人挈長瓢荷大壺以濁醪素琴會於黃神之谷興也按谷之西頂實三峰東面石壁藂倚東爲洞壑乳竇潛泄成盤渦兩岸合闕若與天接二三子將極其深也至則係馬山足披藁石門人自洞口至於梯路踰連嶂而輿疊嶂度嶇嶇而躡凌兢黃緣絕磴及橫嶺而止澡身乎飛泉濯纓乎清漣想夫君俟我於蓮花峰之下碧空嬋娟愛而不見搔首空山然後靡靈草以爲席傾流霞而相歡楚歌

徐動沂詠亦發清商激於琴韻白雲起於筆鋒是日也高興盡而世緒遣幽情形而神機生頽然覺形體六藏悉爲外物天地萬有無非秋毫既醉且止則亦足言以志仙跡且旌吾友嘉會之在山也

宰相及百官定昆池旬宴序

孫逖

古者天子居青陽服蒼玉於是乎和令布德行慶施惠其義遠矣粵若稽古皇帝御天下之十有九載溥暢神化弘宣大明氏羗來享四方無事元凱升朝百揆時序年屢豐而多慶物由庚而自樂乃賜羣臣十日宴所以畢春氣樂太平也越三月己巳會於定昆池於是秉鈞宗工執事庶尹元袞赤舄黼衣繡裳奉璋戩戩珮玉鏘鏘仰丹闕而拜命俯清川而樂飲大庖孔碩尹京爲致餼之司旨酒思柔柱史爲佐搏之政既錫之以高會又悅之以備樂修妓羅舞名倡間歌含姑洗於鐘鼓動陽春於羽籥陟則設帟降則具舟榜文鵠以沂洄與

飛鷗而狎玩魴鱖甫甫鳬鷺翼翼薰風敷散於艸木喜氣宛延於郊
甸亦既醉止于胥樂兮夫恩之所覃者深則感之所及者遠非之於
大足以助天地之同和伸之於微足以致魚鱉之咸若大君垂裕豈
虛也哉詩以展事抑惟舊典我上相裴公中書令蕭公輔弼皇極緝
熙文教以爲正國風美王化者莫近於詩微言浸遠大義將缺乃命
草剡浮靡導揚雅頌斲雕爲樸取實棄華親題首章以倡在位皇矣
上帝式歌文王之德穆如清風方聞吉甫之頌請問其目列之如左

黃帝廟碑序

宋李昉

天下暴亂聖人用干戈而靖之天下寧靜聖人用道德而化之昔有
蚩尤肆殘毒孰能去焉涿鹿有氛侵孰能平焉黃帝所以鎮神威而
大定也雲官紀符瑞孰能享焉土德成運數孰能興焉黃帝所以神
明德而致太平也按史冊覽五帝之舊記閱經籍稽百王之大典以

治世之法爲師範以嚴祀之禮立教化大宋開統之十有三祀開寶
紀號之五載彝倫攸敘萬國咸寧西踰邛樊之鄉東極神樞之地北
窮絕塞南極丹崖靡不沐皇風而被德教萬里之斥堠無虞四方之
風雨咸若文武並用農戰交修師旅無六月之征倉庾備九年之蓄
途歌里唱遠頌近謠矣惟我皇帝陛下握乾符受天命爲億兆之主
居九重之尊靜則端拱凝旒來八方之琛賁動則靈旗萃輅盪六合
之妖孽圜丘展禮天地享其至誠萬物効靈人神協其佳瑞所謂登
三皇而邁五帝也一日御便殿顧謂輔臣曰前代帝王有功德昭著
澤及生民者宜加崇奉豈可廟貌墮而享祀寂寞乎當命有司遍加
興葺輔臣承命拜稱萬歲即日頒旨洋洋德音無翼而飛騰域中矣
今坊州黃帝廟即其一也本郡守土臣以厥功告畢列狀求文詔以
掌綸之臣昉俾文之以琬琰用紀其修建之跡臣昉謹撫舊史而屬

言曰昔者炎帝道衰諸侯未制惟力是恃伊民何依黃帝於是神聰
明之德振威武之氣雕虎一嘯猛暴不覺震驚神龍未起陸梁先知
悚懼始以兵法治其亂次以帝道柔其心寰海塵飛一朝盡息修德
振旅勸農務穡登沅湘而逐薰鬻無遠不臨舉風后而用力牧惟賢
是試少昊顓頊嗣其瑞雲之德而宇宙清唐虞堯舜法其垂衣之道
而域中化天生斯民樹之司牧爲司牧者能以皇帝修身理國之道
以御今之世而生靈不登仁壽之域者未之有也天有歷數鍾我皇
朝考求參訂徵祀事於前文正藻蘋繫薦時羞於廣殿羽衛似巡於
東海神兵如戰於阪泉尚憑德於威靈永垂休於黎獻虔遵睿旨謹
序

遊鄠山詩序

程顥

僕自幼時已聞秦山多奇占有扈者尤復秀出常恨遊賞無便嘉祐

二年始應舉得官遂請於天官氏願主簿書於是邑謂厭飫雲山以償素志今到官幾二年矣中間被符移奔走外幹者三居其二其一則簿書期會倉廩出入固無暇息惟白雲特在山面最爲近邑嘗乘閒兩至其餘佳處都未得往變化初心辜負泉石五年二月初吉聞貳車晁公來遊諸山先是晁公見約同往會探吏失期二日早晁公以書見命始知車騎已留艸堂走白邑大夫張君時民產有在山麓者以罪沒官府符方命量其租入之數因請以往鞭馬至山而晁公已由高觀登紫閣還憇下院見待已久遂奉陪西遊經李氏五花莊息駕池上夜宿白雲精舍詰旦晁公西首僕復並山東遊紫閣登南山望仙掌回抵高觀谷探石穴窺石潭因周視所定田徜徉於花林水竹間夜止草堂是晚雨氣自西山來始慮不得徧詣諸境一霎遂霽明日入太平谷憇息於重雲下院自入太平谷山水益奇絕殆非

人境石道甚巖下視可悸往往步亂石間入長嘯洞過虎溪西南下至重雲閣訪鳳池觀雲頂凌霄羅漢三峰登東嶺望大頂積雪復東北來雲際下深澗白石磷磷於水間水聲清冷可愛坐石掬水戀戀不能去者久之遂宿大定寺凌晨登上方候日初上西望藥山北眺大頂千峰萬巒目極無際下山緣東澗渡橫橋復憩於重雲下院出谷遊太平宮故基而歸馬上率爾口語往往成詩章自入山至歸凡四日得長短詠共十二篇姑存之以誌遊覽之次第云

遊靈巖詩序

鮮于侁

熙寧三年秋侁行部偶公暇與太守虞曹郎李茂先晉弼僉謨殿省臣文紳儀公遊藥巖精舍舟南下數里乃並崖登山又數百步有一巖環覆可拾畝宮構其下崖壁巖呀石色乳竇怪不可名品像殿之前有一軒瞰臨溪山俯仰可愛又東行迤邐行間見石脉出泉玉色